

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**MIŠLJENJE**

**po zahtjevu pravnog savjetnika Heinzl Group, advokata Dr. Johannes Klezl – Norberg iz  
Austrije, o obavezi podnošenja prijave namjere koncentracije**

**Sarajevo  
Oktobar 2009. godine**



**Broj: 01-01-26-738-5-I/09**  
**Sarajevo, 21.10. 2009. godine**

Na osnovu člana 25. stav (1) tačka f) Zakona o konkurenciji ("Službeni glasnik BiH", br. 48/05, 76/07 i 80/09), a po Zahtjevu pravnog savjetnika Heinzl Group, advokata Dr. Johannes Klezl – Norberg, Gaadnerstrasse 80, 2371 Hinterbruehl, Austrija zaprimljenog od strane Konkurencijskog vijeća dana 09.09.2009. godine pod brojem: 01-01-26-738-I/09, Konkurencijsko vijeće, na 96. (devedesetšestoj) sjednici održanoj dana 21.10.2009. godine, je donijelo

### **MIŠLJENJE**

Pravni savjetnik Heinzl Group, advokat Dr. Johannes Klezl – Norberg, Gaadnerstrasse 80, 2371 Hinterbruehl, Austrija (Podnosilac zahtjeva), podnio je Konkurencijskom vijeću Zahtjev za davanje mišljenja o obavezi podnošenja prijave namjere koncentracije (Zahtjev), zaprimljen dana 09.09.2009. godine pod brojem: 01-01-26-738-I/09.

Uvidom u podneseni Zahtjev Konkurencijsko vijeće je utvrdilo da je isti potrebno dopuniti, te je zatražilo dopunu dana 22.09.2009. godine dopisom broj: 01-01-26-738-3-I/09, nakon čega je Podnosilac zahtjeva isti dopunio dana 29.09.2009. godine dopisom broj: 01-01-26-738-4-I/09.

Podnosilac zahtjeva navodi da Heinzl Group iz Austrije, jedan od vodećih evropskih proizvođača celuloze, namjerava da izvrši akviziciju privrednog subjekta iz Austrije, čija je osnovna djelatnost proizvodnja novinskog i magazinskog papira.

U Zahtjevu se navodi da učesnici koncentracije nisu registrovani na teritoriji Bosne i Hercegovine, odnosno nemaju povezanih privrednih subjekata u BiH, već prodaju svoje proizvode kupcima koji se nalaze na teritoriji Bosne i Hercegovine. Podnosilac zahtjeva također navodi da je tržišni udio Heinzl Group i ciljanog društva na relevantnom tržištu BiH u 2008. godini bio oko 40,0%.

Podnosilac zahtjeva traži mišljenje od Konkurencijskog vijeća da li je u obavezi podnijeti prijavu namjere koncentracije u smislu Zakona o konkurenciji (Zakon) s obzirom na gore navedene podatke.

Članom 2. stav (3) Zakona je propisano da se Zakon primjenjuje i na privredne subjekte sa sjedištem i prebivalištem u inostranstvu, ako njihovo djelovanje proizvodi značajan efekat na tržište Bosne i Hercegovine ili na značajnijem dijelu tržišta.

Prema članu 14. stav (1) tačka b) Zakona obaveza podnošenja prijave namjere koncentracije postoji za privredne subjekte – učesnike koncentracije ako ukupan godišnji prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM u godini koje je prethodila koncentraciji ili ako je njihov zajednički tržišni udio na relevantnom tržištu veći od 40,0%. Ukupan godišnji prihod obuhvata poslovne prihode, finansijske prihode i vanredne prihode nakon odbijenog poreza na dodatu vrijednost i drugih poreza koji se direktno odnose na promet i rabat.

Slijedom navedenog, ukoliko ukupan godišnji prihod Heinzl Grupe i ciljanog društva na tržištu Bosne i Hercegovine u 2008. godini iznosi najmanje po 8.000.000,00 KM ili ako je njihov zajednički tržišni udio na relevantnom tržištu u BiH u 2008. godini veći od 40,0% smatra se da postoji obaveza podnošenja prijave namjere koncentracije u smislu Zakona.

Ovo mišljenje je dato isključivo na osnovu podataka navedenih u Zahtjevu, te ukoliko dati podaci odstupaju od stvarnog činjeničnog stanja ovo mišljenje se ne može primijeniti.

**Predsjednik**

**dr. Stjepo Pranjić**